

R.E. Yrausquin & Sons y Kiwanis trahando na Casa Cuna

Pa Ford su 'Global Week of Caring'



ORANJESTAD – Despues di diferente siman corriendo cu e campagna mundial di 'Ford Motor Company Global Week of Caring, R.E. Yrausquin & Sons su empleadonan a traha duro na e beneficio di Casa Cuna. E 'Global Week of Caring' ta un programa mundial caminda Ford Motor Company ta puntra su distribudonan rond mundo pa scohe un bon causa y contribui na dje door di un promocion special. E contribucion ta consisti di un parti financiero y un parti laboral den local cliente y staff ta yuda haci e contribucion yega na un sumo considerabel. Diasabra pasa, dia 1 di october, un grupo grandi di



empleado di R.E. Yrausquin & Sons conhuntamente cu nan famianan, amigonan, Kiwanis Club of Palm Beach, Kiwanis Club of Young Professionals, Kiwanis Circle K y Kiwanis Builders Club a colabora cu otro pa e muchanan di Casa

Cuna. Nan a verf diferente camber, a haci e cura limpi y a drecha bais. Un grupo di mas cu 80 hende a disfruta di traha hunto pa e bienestar di mucha y e profesionalnan na Casa Cuna. Cu donacionan di Kooyman, Wema y TriBike,

mas cu 160 man a haci un multitud di trabou facil. E colaboracion entre e distribudor di Ford na Aruba y Kiwanis Club of Palm Beach ya ta existi pa varios aña y e lema di Kiwanis, 'serving the children of the world', a wordo sirbi un biaha mas cu hopi exito aportando na e bon causa di R.E. Yrausquin & Sons e aña aki. Christina Yrausquin y Gijs Walraven di R.E. Yrausquin & Sons: 'Nos tabata asombra di e energia y e multitud di hende cu a bin voluntariamente pa yuda haci nos proyecto un gran exito. Tur participante, esta nos empleadonan y hende di Kiwanis, a bin hunto facilmente y a caba cu e trabou den un

tempo record. Nos ta hopi agradecido na tur hende cu a participa na e 'Global Week of Caring' di Ford Motor Company di 2011 cu tawata un exito rotundo. Nos ta spera di por ripiti esaki na 2012'. Durante Global Week of Caring, clientenan di R.E. Yrausquin & Sons tambe a contribui na un donacion pa Casa Cuna cu nan compra di diferente articulonnan y via servicio di nan auto. E montante lo wordo entrega otro siman na e muchanan y e directiva di e cas pa nos muchanan. R.E. Yrausquin & Sons kier gradici TUR cu a haci e 'Global Week of Caring' di 2011 un biaha mas pa nan contribucion. □